

POSLOVNIK
Parlamentarnog odbora za stabilizaciju i pridruživanje između
Evropske unije i Bosne i Hercegovine

Član 1.

Parlamentarni odbor za stabilizaciju i pridruživanje između Evropske unije i Bosne i Hercegovine (u daljem tekstu Parlamentarni odbor za stabilizaciju i pridruživanje između EU i BiH) je uspostavljen na osnovu člana 121. Sporazuma o stabilizaciji i pridruživanju između Evropskih zajednica i njihovih država članica, s jedne strane, i Bosne i Hercegovine, s druge strane.

Član 2.

Dužnost Parlamentarnog odbora za stabilizaciju i pridruživanje između EU i BiH je da razmatra sve aspekte odnosa između EU i Bosne i Hercegovine a posebno, primjenu Sporazuma o stabilizaciji i pridruživanju.

Član 3.

Parlamentarni odbor za stabilizaciju i pridruživanje između EU i BiH sastoji se od članova koje imenuju Evropski parlament i Parlamentarna skupština Bosne i Hercegovine.

Mandat članova delegacija Evropskog parlamenta i Parlamentarne skupštine Bosne i Hercegovine određuje se u skladu s pravilnicima, praksama i odlukama nadležnih organa Evropskog parlamenta i Parlamentarne skupštine Bosne i Hercegovine.

Član 4.

Biro Parlamentarnog odbora za stabilizaciju i pridruživanje između EU i BiH čine predsjedavajući delegacije Evropskog parlamenta, predsjedavajući delegacije Parlamentarne skupštine Bosne i Hercegovine i zamjenici predsjedavajućih obje delegacije.

Parlamentarnim odborom naizmjenično predsjedavaju predsjedavajući delegacije Evropskog parlamenta i predsjedavajući delegacije Parlamentarne skupštine BiH. Predsjedavajućeg, kada je to potrebno, zamjenjuje zamjenik predsjedavajućeg njegove delegacije.

Član 5.

Parlamentarni odbor za stabilizaciju i pridruživanje između EU i BiH sastaje se, u principu, dva puta godišnje, jednom u nekom od radnih prostora Evropskog parlamenta, a jednom u Bosni i Hercegovini.

U slučaju vanrednih okolnosti moguće je održavanje videosastanka.

Prijedlog dnevnog reda, koji utvrđuje Biro, u pravilu se dostavlja članovima dvije sedmice prije početka sastanka Parlamentarnog odbora za stabilizaciju i pridruživanje.

Sastanci su javni, osim ako Parlamentarni odbor za stabilizaciju i pridruživanje ne odluči drugačije.

Član 6.

Članovi Vijeća za stabilizaciju i pridruživanje između EU i BiH, uspostavljenog na osnovu člana 115. Sporazuma o stabilizaciji i pridruživanju, članovi Vijeća Evropske unije, članovi Vijeća ministara Bosne i Hercegovine, članovi Evropske komisije i druge osobe, na osnovu odluke Biroa, mogu prisustvovati i govoriti na sastancima Parlamentarnog odbora za stabilizaciju i pridruživanje.

Član 7.

Na prijedlog Biroa Parlamentarnog odbora za stabilizaciju i pridruživanje, mogu se dati preporuke Evropskom parlamentu, Parlamentarnoj skupštini i Vijeću ministara Bosne i Hercegovine, Vijeću za stabilizaciju i pridruživanje, Vijeću Evropske unije i Evropskoj komisiji.

Prijedlog preporuka utvrđuje Biro koncenzusom.

Svaki član Biroa, prije konačnog glasanja o amandmanima i prijedlogu preporuka Odbora, može zatražiti pauzu u svrhu utvrđivanja konačnog teksta prijedloga.

Finalni tekst preporuka se smatra usvojenim ako dobije dvotrećinsku podršku članova delegacije Evropskog parlamenta prisutnih na sastanku i dvotrećinsku podršku članova delegacije Parlamentarne skupštine Bosne i Hercegovine prisutnih na sastanku.

Član 8.

Sekretarijat Parlamentarnog odbora za stabilizaciju i pridruživanje između EU i BiH će osigurati Sekretarijata Evropskog parlamenta i Sekretarijat Parlamentarne skupštine Bosne i Hercegovine.

Za svaki sastanak Parlamentarnog odbora za stabilizaciju i pridruživanje između EU i BiH sastavlja se zapisnik koji se usvaja na početku sljedećeg sastanka.

Član 9.

Članovi Parlamentarnog odbora za stabilizaciju i pridruživanje između EU i BiH mogu se obraćati na jednom od službenih jezika EU ili Bosne i Hercegovine. Pismeni i usmeni prijevodi bit će osigurani na osnovu odluke Biroa Parlamentarnog odbora za stabilizaciju i pridruživanje, i u skladu s internim pravilnikom Evropskog parlamenta.

Član 10.

Putne troškove i novčane naknade za članove Parlamentarnog odbora i službenike koji im pomažu snosi parlament koji ih je izabrao.

Ostalim pozvanim osobama, na osnovu odluke Biroa, putne troškove i novčane naknade snose institucije iz kojih dolaze.

Drugi troškovi u vezi sa sastancima i aktivnostima Odbora raspodjeljuju se između Evropskog parlamenta i Parlamentarne skupštine Bosne i Hercegovine.

Član 11.

Izmjene ovog poslovnika vrše se na isti način i po istoj proceduri kao i za usvajanje ovog poslovnika.
